

आकाशवाणी

खबरां नाट्यपाल सिंह कोला

1. प्रधानमंत्री नरेंद्र मोदी होर स्काईरूट्स इन्फिनिटी कैंपस दा उद्घाटन करडन ते विक्रम-1 राकेट परां पर्दा गुआडडन।
2. मंत्रिमंडल नै पृथ्वी च थहोने आहले स्थाई दुलर्भ धातुनुमा मैग्नेट्स गी बढावा देने लेई 7 जहार 280 करोड़ रपे दे माली मदाद सरबंधी योजना गी मंजूरी दिती ऐ।
3. टकोहदी पंछान सरबंधी भारती प्राधिकरण राश्ट्रव्यापी प्रयास दे तैहत 2 करोड़ थमां बदद मृतकें दे आधार नम्बरें गी बंद करी दिता ऐ।
4. इस बरें दा भारत अंतरराश्ट्री बपार मेला (ITTF) अज्ज सम्पन्न होई जाग।
5. हांगकांग च अग्ग लग्गने आहली दुर्घटना च मरने आहलें दी गिनतरी 44 तोड़ी पुज्जी गई ऐ जदकि 279 जने लापता न।
6. भारत 2030 राश्ट्रमंडल खेड्डें दी मेजबानी करोग। प्रधानमंत्री नरेंद्र मोदी ते गृह मंत्री अमित शाह होरें 2030 राश्ट्रमंडल खेड्डें दी बोली जितने पर अहमदाबाद दी सराहना कीती ऐ।

PM Skyroot

प्रधानमंत्री नरेंद्र मोदी होर अज्ज 11 बजे वीडियो कांफ्रेंसिंग राएं भारत दे अंतरिक्ष सरबन्धी स्टार्ट अप स्काईरूट्स इंफीनिटी कैंपस दा उद्घाटन करडन। प्रधानमंत्री होर गासै च उपग्रह छोड़ने दी समर्थ आहले राकेट विक्रम-1 परा बी पर्दा गोआड़गन। 2 लक्ख स्केयरफुट दे कार्यस्थल च फैली दी इस आधुनिक सुविधा च नमैं डिजाइन घाट विकसित करने ते कई परीक्षण करने दी सुविधान होग जेदे करी एह स्टार्ट अप हर महीने इक आर्बीटल राकेट दा निर्माण करी सकोग। स्काई रूट भारत दी सारें थमां बड्डी निजी अंतरिक्ष कंपनी ऐ जिसदी स्थापना आई.आई.टी दे छात्र ते इसरो दे साबका साइंटिस्ट्स पवन चंदाना ते भारत डाका होरें कीती।

<><><><><><>

PM Ambedkar UNESCO

प्रधानमंत्री नरेंद्र मोदी होरें संविधान दिवस पर पेरिस स्थित यूनेस्को मुख्यालय च डॉ. बाबा साहेब अम्बेडकर हुंदी मूर्ति थमां पर्दा गोआड़ने पर मान जाहिर कीता। सोशल मीडिया दी इक पोस्ट च प्रधानमंत्री होरें इसी डॉ. अम्बेडकर ते संविधान निर्माण च उंदी भूमिका प्रति सच्ची श्रद्धांजलि दस्सेआ। उनें आखेआ जे डॉ. अम्बेडकर हुंदे विचार ते आदर्श असंख्य लोकें गी शक्ति ते आसां-तांगां प्रदान करदे न।

<><><><><><>

Cabinet Decisions

केंद्रीय मंत्रिमंडल ने 7 ज्हार 280 करोड़ रुपें दे बजट कन्नै पृथ्वी दे दुलर्भ स्थाई मैग्नेट दे विनिर्माण गी बढ़ावा देने दी योजना गी मंजूरी देई दिती ऐ। अपनी चाल्ली दी इस पैहली गेंह दा मकसद देशै च हर बरे 6 ज्हार मीट्रिक टन इंटीग्रेटेड रेयर अर्थ परमानेंट मैग्नेट दा विनिर्माण शुरू करना ऐ। सूचना ते प्रसारण मंत्री अश्विनी वैष्णव होरें नमीं दिल्ली च संवाददाताएं गी दस्सेआ जे रेयर अर्थ परमानेंट मैग्नेट सबनें शा मजबूत किस्म दे परमानेंट मैग्नेट चा इक्क न ते इलेक्ट्रिक गड्डिएं, अक्षय ऊर्जा, इलेक्ट्रॉनिक्स, एयरोस्पेस ते डिफेंस एप्लीकेशन लेई बड़े ज़रूरी न। उंनें गलाया जे एह योजना संगठित विनिर्माण सुविधा बनाने च मदाद करग। इलेक्ट्रिक गड्डिएं, अक्षय ऊर्जा, औद्योगिक कम्में ते उपभोक्ता इलेक्ट्रॉनिक्स दी तेजी कन्नै बधदी मंग गी दिक्खदे होई, देशै च रेयर अर्थ परमानेंट मैग्नेट दी खपत 2 ज्हार 30 तगर दूनी होने दी मेद ऐ। ऐल्लै, देशै च रेयर अर्थ परमानेंट मैग्नेट दी मंग मुख रूप कन्नै आयात राहें पूरी होंदी ऐ। इस पैहल दे कन्नै, देश अपनी पैहली इंटीग्रेटेड रेयर अर्थ परमानेंट मैग्नेट मैन्युफैक्चरिंग इकाई बनाग। एहदेनै रोज़गार पैदा होग, आत्मनिर्भरता मजबूत होग ते 2070 तगर नेट ज़ीरो हासल करने दी देसै दी वचनबद्धता गी बी मजबूती थहोग।

<><><><><><>

UIDAI

टकोहदी पंछान सरबंधी भारती प्राधिकरण नै राष्ट्रव्यापी अभियान दे तैहत 2 करोड़ थमां बद्द मृतकें दे आधार नंबर बंद करी दिते न। सूचना प्रोद्योगिकी

मंत्रालय नै जानकारी दिती जे यू.आई.डी.ए.आई नै एह आंकड़े भरत दे जनरल, राज्ये ते केंद्री राज पबंधन आहले क्षेत्रे थमां लैते न। उनें आखेआ जे कोई बी आधार नंबर कुसा होर गी नेई दिता गेआ ऐ। मंत्रालय नै आखेआ ऐ जेकर कुसा जने दी मृत्यु होंदी ऐ ते ओहदे नंबर गी बंद कराना जरूरी ऐ तां जे कुसा बी शिनाख्ती धोखाधड़ी या माली धोखे थमां बचेआ जाई सकै।

<><><><><><>

IITF-2025

इस बरे दा भारत अंतरराष्ट्री बपार मेला आई.आई.टी.एफ अज्ज सम्पन्न होई जाग। इस म्हीने दी 14 तरीक गी नमी दिल्ली च भारत मंडपम च शुरू होए दे 14 दिन दे विशाल वैश्विक मेले च भारत दी समृद्ध विविधता गी प्रदर्शित कीता गेआ। इस बरे दे आयोजन च बिहार, महाराष्ट्र, राजस्थान ते उत्तर प्रदेश भ्याल राज्य हे जिसले कि झारखंड पर मुख तवज्जो हा। एह मेला सरकार, उद्योग ते अंतरराष्ट्री प्रदर्शके दी व्यापक हिस्सेदारी ते बपार, प्रौद्योगिकी ते सांस्कृतिक आदान-प्रदान आस्तै इक वैश्विक मंच दे तौर पर भारत दी अगुवाई करदा ऐ। इस दरान ग्रामीण विकास मंत्रालय आसेआ आयोजित सरस आजीविका मेले नै ग्रामीण महिलाएं गी अपनी कला, कम्म ते हथें कन्नै बने दे समेयान गी दुनिया दे सामने रखने लेई ते सुखने गी साकार करने आस्तै इक मंच दिता।

<><><><><><>

Hongkong Fire

हांगकांग दे ताई पो जिले च अग्ग लग्गने आहली घटना च मरने आहलें दी गिनतरी 44 होई गई ऐ। एह अग्ग इक रिहायशी परिसर च लग्गी। 700 लोकें गी अस्थाई आसरमे च पजाया गेआ ऐ जिसले कि 279 लोक अजें बी लापता न। रिकार्ड थमां पता लग्गा ऐ जे हाउसिंग काम्प्लेक्स च 8 ब्लाक हे, जिंदे च करीब 2 ज्हार अपार्टमेंट हे जेदे च करीब 4 ज्हार 800 लोक रौहंदे हे।

<><><><><><>

Indo-Indoness DM

रक्षा मंत्री राजनाथ सिंह इंडोनेशिया दे रक्षा मंत्री सजाफ्री समा मसोएद्दीन हुं' देकन्नै अज्ज नमी दिल्ली च त्रीए भारत इंडोनेशिया रक्षा मंत्री वार्ता दी सह अध्यक्षा करडन। रक्षा मंत्रालय नै इक बयानै च आखेआ ऐ जे बैठक च क्षेत्रीय सुरक्षा घटनाक्रमें दी समीक्षा दे अलावा बहुपक्खी मुद्दें ते दपक्खी रक्षा सहयोग गी गहरा करने आस्तै नमी संभावनाएं पर बी गल्लबात कीती जाहग। इंडोनेशिया दे मंत्री दो दिन दे भारत दौरें पर न। मंत्रालय नै आखेआ ऐ जे एह यात्रा दौनें मुखें बशकार बददे रक्षा सरबंधें ते सांझेदारी दा विस्तार करने दी सांझा प्रतिबद्धता दी सारत ऐ। इंडोनेशिया दे राष्ट्रपति हुं'दी जनवरी च भारत यात्रा दे मगरा एह बैठक होआ'रदी ऐ, जेदे च दौनें मुखें दे रक्षा सरबंधें गी दिते जाने आहले रणनीतिक महत्व गी होर बल थहोंदा ऐ।

<><><><><><>

राष्ट्रपति द्रौपदी मुर्मू होर अज्ज नमीं दिल्ली च चाणक्य रक्षा संवाद सी.डी.डी-2025 दे त्रीए संस्करण दे उद्घाटनी सत्र गी संबोधित करडन। दो दिन दे इस कार्यक्रम गी 2047 तगर विकसित भारत आस्तै रक्षा सुधारें, तकनीकी बदलाव, नागरिक सैन्य एकीकरण ते भारत दी उभरती सुरक्षा प्राथमिकताएं पर विचार-विमर्श करने आस्तै राश्ट्री ते अंतरराश्ट्री माहिर किट्ठे औडन। सी.डी.डी-2025 दा आयोजन Reform to transform: सशक्त भारत-सुरक्षित और विकसित भारत विशे दे तैहत कीता जा'रदा ऐ। दुए रोज रक्षा मंत्री राजनाथ सिंह होर इस वार्ता गी संबोधित करडन।

<><><><><><>

Common Wealth Games Ahmedabad

भारत गी 2030 दे राश्ट्रमंडल खेड्डें दी मेजबानी थ्होई गई ऐ। 2030 दे राश्ट्रमंडल खेड्ड अहमदाबाद च आयोजित कीते जाडन। इस फैसले गी मंजूरी 74 राश्ट्रमंडल सदस्य मुल्खें दे प्रतिनिधिमंडल आसेआ दिती गई। भारत हुन दुई बारी राश्ट्रमंडल खेड्डें दी मेजबानी करोग। एहदे थवां पैहले 2010 च इनें खेड्डें दा आयोजन नमी दिल्ली च कीता गेआ हा। खेड्ड मंत्री मनसुख मांडविया होरें इनें खेड्डें दी मेजबानी भारत गी थ्होने पर खुशी जाहिर कीती ते आखेआ जे एह भारत आस्ते बड़ी गे मानै आहली गल्ल ऐ। प्रधानमंत्री नरेंद्र मोदी होरें इस आस्ते देशवासिं गी बदाई दिती। गृह मंत्री अमित शाह होरें बी

राश्ट्रमंडल खेड्डें 2030 दा आयोजन भारत च कीते जाने आहली घोशणा
मगरा देशवासिं गी मुबारकबाद दिती ऐ।

<><><><><><>